

Render pli visibel il rumantsch

Dapi 25 onns è il rumantsch ina lingua parzialmain uffiziala da la Confederaziun

■ (fmr/mc) **La Lia Rumantscha pretenda ch'il rumantsch daventia pli visibel en Svizra e ch'el vegnia duvrà pli consequent – quai en consideraziun ch'il rumantsch è dapi 25 onns parzialmain lingua uffiziala.** Malgrà numerus progress en la promoziun da la quarta lingua naziunala saja la realisaziun d'ina comunicaziun plurilingua consequenta da vart la Confederaziun savens anc manglusa, constatescha la Lia Rumantscha.

Diever consequent dal rumantsch

La Lia Rumantscha considerescha il status da lingua parzialmain uffiziala sco basa impurtanta per mantegnair il rumantsch. Ed ella conceda che dapi l'approvaziun da l'artitgel da linguas en la Constituziun (1996) saja vegnì fatg bler per promover il rumantsch. Uschia translatescha la Confederaziun documents relevants sco per exempel il material explicativ da votaziuns en rumantsch. «Sche ina burgaisa u in burgais sa drizza per rumantsch a l'administraziun federala, respunda lezza en rumantsch», constatescha la LR cun satisfacziun.

La realisaziun d'ina comunicaziun plurilingua tar la Confederaziun pudesi però esser meglra. La Lia Rumantscha pretenda perquai in diever pli consequent dal rumantsch en il Parlament federal, en l'administraziun federala ed en las interpresas liadas a la Confederaziun. La LR vul concretamain ch'il ru-

mantsch vegnia utilisà senza excepziun en l'entira Svizra per inscripziuns e signalisaziuns da tut gener. «En il territori rumantsch sto la lingua rumantscha avair prioritad per infurmaziuns a la populaziun, e quai sin tut ils chanals da comunicaziun», scriva la LR en ses communitgà a las medias.

Dapli visibilitad per il rumantsch

«Sch'il rumantsch va a perder en il context naziunal, croda el pli e pli en emblidanza», motivescha il secretari general ad interim *Andreas Gabriel* questa pretensiun. Per mussar ch'i pudes esser simpel da dar dapli preschientscha al rumantsch ha la LR publictà quests dis in curt film sin las medias socialas. Cun ina tschegnada illustrescha il clip a moda exemplarica la negligentscha eclatanta dal rumantsch cun il film animà «Scumandà da traverisar ils binaris».

L'appel da la LR vegn sustegnì cumplainamain er da cusseglier naziunal *Martin Candinas* (PCD GR) che presidescha la gruppa parlamentara «Lingua e cultura rumantscha» che dumbra actualmain passa 80 commembras e commembers. Il messadi da cultura da la Confederaziun per ils onns 2021-2024, deliberà dal Parlament, preveda per l'emprima giada er la promoziun dal rumantsch ordaifer ses territori linguistic tradiziunal, pia er en l'ulteriur Grischun ed en l'ulteriura Svizra.



Tavla d'avertiment da las Viefier federalas a Cuir – senza il rumantsch. FOTO MATTIAS NUTT/MAD